

INUIT ATAQATIGIIT

Inatsisartuni



18. august 2023

UKA2023/47

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naartunermi, erninermi meeravissartaarnermilu sulingiffeqartarnek pillugu Inatsisartut inatsisaat nr. 5, 19. november 2020-imeersoq UKA24-mut allannguutissaanik siunnersuusioqullugit Naalackersuisut peqquneqarnissaannik inatsisartut aaliangiiffigisassaattut siunnersuut, taamaaliornikkut ataataaqataasup ernereernerup, meeravissartaareernerulluunniit kingorna anaanaaqataasut assigalugit sulingiffeqarsinnaalerseqqullugu.

(Inatsisartunut ilaasortaq Peter Olsen, Inuit Ataqatigiit)

Tungavilersuut:

Ullut piffiillu qanga allaanerugallarmata suiaaqatigiit katissinnaanatik, immikkoortitaallutik taamaallaat inooqatigiittut – apparittut nalunaarsorneqarsinnasarnikkupput.

Qujanaqisumillu ullut piffiillu ullumikkut allanngorsimalerput, ingerlariaqqillutalu alloriaqqissimalerpugut, tassami qallunaat nunaanni apparilersarneq apparikkunnaarnerlu pillugit inatsit 2012-mi allanngortinneqarpoq, taamaaliornikkut apparit suiaaqatigiit kommunip allaffianut saaffiginnikkut, kommunip allaffiani katisinneqarsinnaalerput, allatullu apparittut katissimasutut nalunaarsorneqarsinnaalersinneqarlutik.

Qujanaqisumilu tamatuma kingorna 2016-mi, peqqussut aqqutigalugu, peqqussutikkut inatsit tamanna nunatsinni aamma atuutilersinneqarluni.

Taamatut alloriaqqinneq tamatsinnut assorsuaq nuannersuuvoq, pitsaasuvoq, tulluusimaarnartuullunilu. Minnerunngitsumik suiaaqatigiit eqqarsaatigalugit, alloriaqqinneq taamaattoq pitsaaginnarani suiaaqatigiinnut apparinnut tamanut peqqinnartuuvoq toqqissiallannartuullunilu.

Suiaaqatigiinnut peqqinnarlunilu toqqissiallannartuuvoq pissutigalugu, suiaaqatigiit immikoortinneqarunnaarlutik, inuttut allatulli isigineqalerlutik katissinnaangorput, apparittullu katissimasutut inatsisigut pisinnaatitaaffeqalerlutillu illersorneqalertussanngormata.

Torrak tassa ajunngilluinnarpoq, tassa inuuneq taamaassaaq aamma taamaattussaavoq pitsaanerusinnaanngilaq, allaaneruserinnaanngilarlu.

Kisianni suli naammassinngilavut, suiaaqatigiit pillugit inatsisigut nalimmassaasoqarnissaa, illersorneqarnissaallu pillugu suli suliassarpassuaqarpugut.

Assersuutigiinnarsinnaavarput qulequtaq qulaani pineqartoq, tassalu; Naartunermi, erninermi meeravissartaarnermilu sulingiffeqartarnek ullormusiaqartarnerlu pillugit Inatsisartut inatsisaat nr. 14, 7. december 2009-imeersoq taassumalu kingorna 2019-mi aammalu 2020-mi allannguuteqartinneqarnikuusoq.

Kingullermik 2020-mi allannguinermi; Inatsisit Nr. 5, 19. novembarip 2020-meersumi anaanaaqataasoq sulinggiffeqarsinnaanngortinneqarpoq, ajoraluartumilli suaiaqatigiinni ataataaqataasoq ilanngunneqarsimangilaq.

2020-mi allannguinermi anaanaaqataasoq kisimi illersorneqalerpoq, suaiaqatigiinnili ataataaqataasoq sulinggiffeqarsinnaanermut tunngatillugu periarfissaqanngilaq, inatsisigut allassimannginnami, tassa imaappoq illersugaannginnami.

Tamanna ajorpoq pitsaasuunngilarlu. Ataataaqataasoq allatulli perorsaaqataasut, ataataasup anaanaaqataasullu inatsisitigut pisinnaatitaaffiisa assinganik aamma pisinnaatitaaffeqartariaqarpoq.

Ataataaqataasoq ataataasutulli meeqqamik perorsaaqataallunilu akisussaaqataasuuvoq.

Taamaattumik pisariaqarpoq, pingaaruteqarluinnarporlu ataataasup anaanaaqataasullu inatsisitigut erlersugaanerattulli, ataataaqataasup inatsisitigut aamma erlersugaasariaqarnera.

Taamaattumik tamanna pillugu siunnersuutigaara ataataaqataasup allatulli ataataasutut inatsisigut illersugaalluni ernereernerup, meeravissiartaareernerullu kingorna aamma sulinggiffeqarsinnaatitaaleqqullugu.

Neriullunga siunnersuutiga ilassilluarneqarumaartoq.

Qujanaq

Pisortanut aningaasatigut allaffissornikkullu kingunerisassai:

Inatsimmik allanngueq, allaffissornikkut ingerlatsinermi AC-mik ilinniarsimasup nalinganik, tassalu ukiumut 500.000 kr.-nik naleqarumaartoq..

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq